

1427-XI-17. Segovia.—*Juan II notifica al concejo de Murcia el nombramiento como regidor de Alfonso Fajardo.* (A.M.M., Cart. 1411-29, fol. 185r.)

Yo el rey, enbio mucho saludar a vos el conçejo, alcaldes, e alguazil, regidores, caualleros, e escuderos, e omes buenos de la noble çibdat de Murçia como aquellos de quien fio.

Bien sabedes en como yo oue fecho merçet del ofiçio de regimiento que vaco enesa dicha çibdat por muerte de Gonzalo Garçia de Notal, mi regidor que fue desá dicha çibdat a Alfonso Fajardo, donzell del rey de Nauarra, mi muy caro e muy amado primo, conel salario e derechos al dicho ofiçio pertenesçientes, segund que mas largamente se contiene en una mi carta que en la dicha razon mande dar, la qual diz que vos fuere presentada, e que la no auedes conplido por algunas razones que alegastes.

Porque vos ruego e mando sy seruiçio e plazer me auedes de fazer que pues yo por conteplaçion del dicho rey de Nauarra mi muy caro e muy amado primo, fize merçet del dicho ofiçio al dicho Alfonso Fajardo que lo querades reçibir luego a el, segund que por la dicha mi carta vos enbie mandar, ca esto fecho e conplido por vosotros, mi entençion e voluntad es de vos no quebrantar ni que por ende vos sea quebrantados vuestros preuillejos, e usos, e costunbres para adelante, mas antes es mi merçet de vos los mandar guardar, e asy vos lo aseguro.

Dada en la çibdat de Segouia, diz e syete dias de nouienbre, del año de XXVII. Yo el rey. Yo el doctor Ferrando Dias de Toledo, oydor e relator del rey e su secretario, la fiz escreuir por su mandado.

1427-XI-20. Segovia.—*Juan II a Juan Alfonso de Soria, su ballestero de maza, sobre los daños que Alfonso Yañez Fajardo pretendía hacer en las tierras de Fernando Pérez Calvillo.* (A.M.M., Cart. 1411-29, fols. 187r.-v.)

Don Juan por la graçia de Dios rey de Castilla, de Leon, de Toledo, de Galizia, de Seuilla, de Cordoua, de Murçia, de Jahen, del Algarbe, de Algezira, e señor de Vizcaya e de Molina. A vos Juan Alonso de Soria, mi vallestero de maça, salud e graçia.

Sepades que Ferrand Peres Caluillo, mi vasallo me fizò relaçion diziendo que yo le auia mandado dar otras mis cartas para Alonso Yañes Fajardo, mi adelantado



mayor del regno de Murçia, e sobre otras cosas que le cunplen, segund que mas largamente en las dichas mis cartas es contenido, e que por temor del dicho adelantado, escudero suyo ni otra presona alguna de su casa que no le osaran yr, leer ni publicar las dichas mis cartas, por ende que me pedia por merçet que le mandase dar un mi vallestero de maça para que fuese alla sobre ello, e yo touelo por bien e es mi merçet de vos enbiar alla.

Porque vos mando que tomedes las dichas mis cartas que vos seran dadas por el dicho Ferrand Peres Caluillo, e vayades a la dicha çibdat de Murçia o a otro lugar qualquier onde el dicho adelantado estudiere e le notifiqedes las dichas mis cartas e gelas publiquedes e tomedes testimonio sobre todo ello sy menester fuere e fagades çerca de la dicha publicaçion e notifiçacion de las dichas mis cartas todas las cosas e cada una dellas que ende se requieren e vayades con la muger e fijos del dicho Ferrand Peres Caluillo a la dicha çibdat de Murçia e al Alguaç a do dize que entyende veuir porque seguramente puedan entrar en la dicha çibdat e logar como yo mando por las dichas mis cartas e pongades tregua e seguro entre el dicho mi adelantado e los suyos e el dicho Ferrand Peres Caluillo e los suyos por un año, la qual dicha tregua por vos puesta yo por esta mi carta les pongo e les mando que la guarden por el dicho tiempo so las penas en que caen aquellos que no guardan tregua puesta por su rey e su señor natural, para lo qual vos do poder conplido por esta mi carta, e no fagades ende al por alguna manera so pena de la mi merçet.

Dada en Segouia, veynte dias de nouienbre, año del nasçimiento del nuestro Señor Jhesuchristo de mill e quatroçientos e veynte e syete años. Yo el rey. Yo Diego Romero la fiz escreuir por mandado de nuestro señor el rey. E en las espaldas de la dicha carta dezia, acordada en consejo. Relator. Registrada.

1427-XI-28. Segovia.—*Juan II notifica el nombramiento de Sancho de Dávalos como regidor de la ciudad de Murcia en lugar de Lope Ruiz de Dávalos, su abuelo.* (A.M.M., Cart. 1411-29, fols. 191r.-v.)

Don Juan por la graçia de Dios rey de Castilla, de Leon, de Toledo, de Gallizia, de Seuilla, de Cordoua, de Murçia, de Jahen, del Algarbe, de Algezira, e señor de Vizcaya, e de Molina.

Por fazer bien e merçet a vos Sancho de Daualos, nieto de Lope Ruys de Daualos, vezino de la çibdat de Murçia, fago vos mi regidor de la çibdat de Murçia en lugar del dicho Lope Ruys de Daualos, vuestro ahuelo, mi regidor que fue de la dicha çibdat, por quanto el dicho Lopes Ruys lo renunçio e traspaso en vos segund e en la manera que lo el auia e tenia, e me enbio pedir por merçet por su petiçion que vos fiziere merçet del dicho ofiçio e do vos el dicho ofiçio pero que

